

02/07/2002

Kemenangan Barisan Nasional hadiah bagi Dr M

MELAKA, Isnin - Kemenangan Barisan Nasional (BN) pada pilihan raya kecil Parlimen Pendang dan Dewan Undangan Negeri (DUN) Anak Bukit akan menjadi hadiah berharga Perdana Menteri, Datuk Seri Dr Mahathir Mohamad, yang bersara tahun depan.

Sehubungan itu, pengundi di dua kawasan terbabit perlu memanfaatkan undi mereka sebaik mungkin dan sekali gus menunjukkan kesetiaan tidak berbelah bagi terhadap Dr Mahathir selaku Presiden Umno dan anak jati Kedah.

Setiausaha Kerja Badan Perhubungan Umno negeri, Datuk Ahmad Hamzah, berkata berdasarkan reaksi awal yang diterima mendapati pengundi di kawasan terbabit mulai sedar mengenai corak pemerintahan kerajaan BN dan jasa yang dilakukan oleh Dr Mahathir.

"Jika dulu kebanyakan mereka keliru dan terpengaruh dengan dakwah pembangkang, tetapi pada pilihan raya kali ini, BN yakin untuk merampas semula dua kerusi di kawasan terbabit.

"Sebagai rakyat Kedah, mereka pasti ingin memberikan sesuatu yang istimewa kepada Dr Mahathir sebelum beliau bersara dengan memberi kemenangan kepada calon BN pada pilihan raya kecil kali ini," katanya kepada Berita Harian di sini, hari ini.

Pilihan raya kecil Parlimen Pendang dan DUN Anak Bukit akan diadakan serentak pada 18 Julai ini berikutan kematian penyandang kedua-dua kerusi itu, Datuk Fadzil Noor, 23 Jun lalu.

Sehubungan itu, Ahmad yang juga Ahli Dewan Undangan Negeri (Adun) Serkam, berkata Umno Melaka menghantar 250 petugas pilihan raya sejak empat hari lalu bagi memantapkan jentera BN pada pilih raya kecil itu.

Beliau berkata, petugas itu diketuai ADUN Alai, Datuk Amid Nordin akan mengawasi tujuh peti undi meliputi kawasan Taman Aman, Akar Mandi, Pekan Anak Bukit, Kampung Anak Bukit, Suka Menanti, Cegar dan Pantai Johor.

"Kita yakin jika pengundi diberi maklumat yang tepat dan jelas, mereka pasti menyokong BN. Setakat ini BN telah menunjukkan buktinya dan Umno cukup positif pengundi akan terus menyokong calon BN selain faktor persaraan Dr Mahathir pada pilihan raya kecil kali ini," katanya.